

Q. D. B. V.  
DISSERTATIO PHYSICA  
EXHIBENS

---

COGITATIONE  
DE  
ANIMA HUMANA  
SOBRIAS

---

QVAM  
PRAESIDE  
D. MART. GOTTHEL  
LOESCHERO

PHYS. PROF. PVBL. ORDINAR. MED. EXTRA - C  
SERENISS. DVCIS SAXOVINAR. PHYSICO PROVIN  
CIALI ET H. T. DECANO

P. P.  
PETRVS FRIDERICVS KÜSCH  
SLESVICENSIS.

AD DIEM IIX. APRIL. A. R. S. MDCCXXIV.  
IN AVDITORIO MAIORI.

---

WITTENBERGAE, LITERIS VIDVAE GERDESIAE.







## COGITATIONES

DE

ANIMA HUMANA  
SOBRIAE.

I.



nimae humanae considerationem maxime ad Philosophiam naturalem pertinere, nemo facile negabit, quoniam homo utpote nobilissima Creatura, et ad imaginem divinam condita, etiam nobilissimum huius scientiae constituit obiectum. Hominis vero

pars maxime eminens mens est, qua ipsi Deus nihil contulit praestabilius, et in ea consilium vitae, regimenque locatum esse deprehendimus. Adeo vero arcte cum corpore suo est coniuncta, ut in eodem non equidem uti in carcere molesto, uti quidam somniant, sed potius domicilio grato et accommodato habitet,



atque actiones suas et operationes secundum naturam in eo perficiat, imo gravissimos et saepius fere intolerabiles cruciatus aequae ac dolores subeat, in morbis ac tortura civili in foro usitata, quibus facile alias superfedere, atque se ab iisdem liberare posset, si hoc ab ipsius voluntate dependeret. Illa ipsa quoque anima verum atque genuinum est principium vitae, motus et sensus, aliarumque actionum animalium in homine, qui quippe absque eadem in demortuum degenerat cadaver, quando morte appropinquante fatalis et exitialis mentis a corpore contingit separatio. Mechanica enim corporis humani constitutio non sufficit, si in hominis machina exponendum est illud, quod est vitale, sensuale, rationale, et actionum reliquarum in homine fundamentum, sed ad negotium intellectus, perceptionis, voluntatis et vitae humanae longe praestantius, quid requiritur, quam materialis, extensa, passiva et finibus materialibus circumscripta quaedam substantia, quae praestantissimas, eminentissimas et spirituales has actiones praestare neutiquam potest.

## II.

De anima itaque hominis rationali, cogitationes sobrias proposituri ante omnia inquirere debemus in eiusdem rationem et essentiam. Ubi quidem in apri-  
co est, sententias de eadem non ab omni errore esse liberas. Quoniam itaque optandum est, ut mens sit sana, in corpore sano, nescimus, qua amentia capti sint isti, qui plane nullam animam in homine existere, asseverare contendunt, atque vitam otio absque actionibus rationalibus, instar pecorum, transigere malunt, quam



quam sese a brutis anima rationali distinguere. Antiquissima vero de Essentia animae humanae sententia ex Schola Philosophiae Platonicae nata esse videtur, qua anima humana portio animae totius universi atque mundi esse asseritur. Postea vero missis aliorum antiquiorum Philosophorum opinionibus, Aristoteles triplicem potissimum statuit animam, vegetativam, sensitivam et rationalem, quam animarum differentiam, a triplici viventium genere, plantis, brutis et homine procul dubio desumpsit. Postea Cartesius eam dixit esse cogitantem, quia anima humana sua sponte cogitat, et cogitationes animae sua sponte in mente observantur, et perenni atque essentiali quodam modo, ueluti lux igni adhaerent et adsunt. Post Cartesium recentiores varias de eadem opiniones foverunt, alii enim putant eam esse particulam divinam, pari ratione ac Echo a sono procreatam: alii eam materialem esse, hancque sententiam omnipotentiae divinae neutiquam repugnare existimant, potuisse Deum animam cogitantem et rationalem, sub materiali ratione corporibus humanis praeficere. Atque illi alii huius opinionis Patroni, qui materialem animam statuunt, rationibus nituntur sequentibus: Quoniam anima cum corpore materiali arctissime, tanquam substantia homogenea, esset coniuncta, atque nullos nisi materiales formaret conceptus, et porro proprietates materiae nempe successionem loci et temporis observaret, et hac ratione sensus motusque in homine, horumque operatio et connexio melius explicari posset. Horum autem opinionem facile redarguit benedictio et voluntas divina, quae homini spiritum seu animam immaterialem inspiravit, qua opus habebat ad vitam,



activitatem et motionem, nec non rationis in homine effectus et phaenomena. Atque si iuxta Cartesium cogitationes sunt de essentia animae rationalis in homine, exponere debet hic acutissimus alias Philosophus cogitationes hominis dum adhuc vitam agit in utero materno, & quando somno profundo sepultus est, ac absque omni cogitatione dormit: cogitationes vero ac conceptus materiales materiae proprietates obtinentes, non adeo ab ipsius animae humane, essentia, quam perpetua a puerili et infantiae aetate, et naturali quasi quadam consuetudine, sunt derivandi. Coeco etiam impetu feruntur isti, qui mentem motum, actum, vim impetumque in corpore humano appellare non dubitant, atque ita optime animae humanae essentiam descripsisse vana persuasione permoti sibi videntur. Quamnam vero luce radiet istorum opinio, qui animam nostram lucem esse et ignem, flammulamque vitalem in corde, obfuscatò maxime rationis lumine contendunt, in aprico est: ignem enim vitalem et animae in corde nemo hactenus ardere vidit, flammulaque vitali inflammati nunquam extiterunt homines. Si itaque pronuntiandum est, quod res est, anima humana est substantia immaterialis, percipiens, intelligens, cogitans, corpus regens et cum eodem arctissime coniuncta, ut illud, in gravissimis cruciatibus etiam haudquaquam derelinquat, nec nisi morte ab eodem separetur.

### III.

Atque adeo circa animam potissimum considerare debemus eius Proprietates, vel, si mavis, affectiones, Affectus five Passiones, nec non actiones in corpus.



pus. Proprietas animae maxime propria, imprimis quatenus cum corpore humano est connexa, est perceptio. Est enim perceptio in homine ea animae proprietas, vis atque potentia, qua ea, quae in cerebro ab organis sensoriis ipsi repraesentantur, percipit, et se ab iisdem affici patitur. Quae mentis affectio ne utique cum sensu communi ac interno, neque quoque cum ipso intellectu est confundenda. Modum vero, quo anima percipit, ingenue nos nescire confitemur, inexplicabile enim est, quomodo spiritus corpus possit attingere, et versa vice corpus spiritum afficere.

## IV.

Sequuntur Cogitationes quasi consequentia Perceptionis. Illae vero sunt compositiones et repetitiones illarum rerum, quae animae occasione sensuum externorum proponuntur, ab ipsa mente proprio nisu institutae, atque ab ipsius virtute cogitandi dependentes. *Cowardus*, qui cogitationes materiales statuit, definit eas per continuam idearum in cerebro circulationem, atque per Ideas intelligit species sive imagines obiectorum externorum, ab ipsis per organa sensoria ad cerebrum delatas, vid. eiusdem *Scrutinium exactum in notiones modernas*. Ut vero ulterius cogitationes materiales esse confirmet, existimat, omnes cogitationes a sensibus externis exoriri, ipsas a rebus materialibus, nempe morbis cerebri, inebriatione, posse immutari, nos vero easdem inter sese permutare, e. g. ut ex tristibus hilares evadant, non valere, atque tandem animam cogitatione imitari corpora, successive et de rebus in hoc vel illo loco existentibus, hoc vel aliud agentibus, vel patienti-



tientibus cogitando. Nactus itaque est adversarium *Iohannem Bronchton*, qui in sua *Psychologia* eum inter ipsos Atheos refert. . Ipsae etiam *Corwardi* rationes facile corruunt, vel ex haecenus dictis, vel etiam quod anima humana de Deo, angelis, scientiis, abstractionibus universalibus, quotidie cogitationes satis distinctas et claras sibi efformet.

## V.

Non minus ad proprietates animae pertinet eiusdem cum corpore coniunctio, de qua supra diximus, arctissima. Quapropter etiam Veteres multa de vinculo mentem cum corpore coniungente posteritati reliquerunt. Illud itaque communi opinione erant Spiritus animales, et quia intimum ipsis intercederet cum mente commercium, et quia mediae quasi inter corpoream et incorpoream substantiam essent naturae, adeoque etiam a quibusdam recentioribus Anima materialis, quam cum brutis habemus communem, appellantur. Melius vero haec res hodie explicatur, quippe ubi vinculum adeo arcte animam et corpus coniungens, constituitur convenientia actionum animae cum actionibus corporis, ita ut sibi invicem ad nutum animae respondeant. Tandiu enim anima amice cum corpore coniungitur, quamdiu corpus rite constitutum eiusdem actiones recipere, iisdemque respondere potest.

## VI.

Anima itaque cum corpore adeo intime unita, procul dubio etiam sedem fixam et certam in eodem habet.



habet. Atque hic quidem sententia Aristotelis eminet statuentis, animam esse totam in toto corpore, et totam in qualibet eiusdem parte. Veteres reliqui vel in cerebro, vel in corde, vel cum Helmontio in sinistro stomachi orificio, eam residere credebant, quoniam in his visceribus anima se magis ac in aliis manifestaret. Nos, simenti quaedam sedes in corpore est assignanda, illam cum recentioribus constitui- mus centrum ovale seu cerebri partem medullarem interiorem, et omnium nervorum principium. Cartesius hic peculiari modo sentit, nam equidem nobiscum consentit, sedem animae esse in cerebro, sed non centrum ovale, verum glandulam pinealem, quae glandula quaedam cerebri dura ac rubicunda est, membrana propria satis crassa et firma iuxta *Ruyschium The- sauro I. et V.* praedita. Reliquas hac de re hypotheses, brevitatis studiosi, praetermittimus.

## VII.

Inter proprietates mentis merito quoque recen- semus vim illam, qua se multiplicare potest. De qua quidem notandum, quondam in duas partes hac in causa abuisse Philosophos, aliosque per traducem, alios vero per inducem vel novam creationem animam propagari, existimasse. *Dikinsohn Veteri et nova Physica* sibi persuadet, generationem animae optime modo chymico explicari posse, ita, ut ea ex mistione semi- num materialium, flammam spirituales quasi concipiat, pari ratione ac ex connubio Spiritus nitri recti- ficatissimi et liquidi, et oleo Therebintinae flamma exoritur. At enim vero nos lubenter et hoc igno-



rare confitemur, cum in propatulo sit, eam fieri modo spirituali, adeoque sub conceptu quodam imaginativo ac materialia aemulante neutiquam repraesentari posse.

## IIX.

De reliquo etiam anima rationalis peculiari quadam ac excellenti proprietate gaudet, nempe vi divinandi ac futura quaedam naturalia et iuxta naturae leges et consuetudinem contingentia praedicendi. Haec itaque est illa animae potentia, qua in obscura et ignota potest penetrare, eademque explicare, futura naturalia aliquando praesagire, hominum cogitationes revelare, atque eventus sive rerum, sive actionum pronuntiare valet. Hanc divinandi potentiam animae propriam esse, ex eo luculenter patere videtur, quoniam se tunc temporis maxime exerit, quando anima sibi est relicta, et a corpore non adeo afficitur, e. g. in Ecstacticis, et hominibus morti proximis. Accedit, quod anima praeteritorum possit recordari, quidni etiam futura cognoscere posset, cum nihil adeo novi fiat in mundo, cuius idea non sit et notio quoque, qua illa exprimere possemus in anima, uti equidem iudicat *Petrus Petitus Libro de Sybilla*. Addimus, quod quotidie nova inveniantur, de quibus maiores nostri nullam habuerunt notitiam. Haec uirtus animae divinandi etiam in Arte salutari solennis est, atque Medicus eadem ex diligenti phaenomenorum humanae naturae observatione, multa de morborum eventu vel salutari, vel lethali, potest praedicere, diemque ac tempus mortis aliarumque circumstantiarum in morbis occurrentium determinate denominare.

Quo



Quo loco tamen notare convenit, hanc animae nostrae divinandi potentiam, non ultra suam sphaeram esse extendendam, atque ad revelationem rerum divinarum applicandam, nos enim tantum de futuris contingentibus, atque quae quotidie fieri solent, loquimur, neutiquam vero de futuris insolitis, divinis et extraordinariis.

## IX.

Huc etiam spectat Ingenium, quo homo pollere dicitur. Est vero Ingenium illa animi potentia, qua aliquis cogitando facile aliquid invenire, atque proposita ab alio cito capere, et firmiter tenere, ac utrumque horum recto iudicio veluti ad stateram examinare potest. Producitur ab egregio intellectus, rationis et iudicii temperamento, atque in aliis in minori, in aliis uero maiori gradu observatur, pro diversa nempe succi nervei indole, cerebri structura, nec non diverso vitae genere, et climate regionum, in quibus vivimus.

## X.

Operationes animae, ad quas in praesenti cogitando devolvimur, sunt eiusmodi actiones, qua illa ex omni vi sua ac potentia, atque quasi cum ipsa sua essentia agit. Earum prima est Intellectus, per quem intelligimus illum animi vigorem, quo mens intelligendo in se ipsam reflectitur, atque ex occasionibus cogitandi a sensu et imaginatione subministratis, proprioque instinctu, notiones format varias, iisque collatis inter se et comparatis, eo ratiocinando provehitur,



ut non solum res extensas et corporeas, verum ex observationibus rerum, per singularum inductionem, res etiam incorporeas, et a sensibus longissime remotas, et nulla imagine ac specie visibiles et repraesentabiles, concipit, et, quantum fieri potest, apprehendit. Atque ut haec, quae de Intellectu diximus, eo clarius pateant, mens intelligendo triplici ratione operatur. Primo ex cogitationibus a sensu et imaginatione, vel animae propria potentia cogitandi ortis, notiones rerum et conceptus format. Secundo has notiones inter se confert & comparat, v. c. corporis et spiritus, bruti et hominis, corporum terrestrium et coelestium. Tertio horum omnium adiumento, ac observatione rerum omnia, et corporea, et incorporea, rite agnoscit et apprehendit, e. g. ipsum Deum, animam, abstractiones metaphysicas, scientias et artes. Ex his tribus intellectus operationibus, fluit ratiocinatio et Iudicium. Nam si cogitando res animo quasi libramus et expendimus, ita, ut easdem clare et distincte et per suas causas ac affectiones cognoscamus, oritur ratiocinatio. Quod si uero iisdem cogitationibus verum a falso, bonum a malo, adversum a grato, honestum ab inhonesto, utile ab inutili discernimus, vocatur haec operatio Iudicium.

## XI.

Altera mentis operatio est Voluntas, qua ea se libere ad illa, quae intellectu concipimus cognoscimusque, determinat, et, quae nos bene afficiunt, prosequitur, quae contra male nos tractant, fugit et adversatur. Exinde dependent Inclinationes, quae vocantur,



tur, in studia, artes, voluptates, animique pathemata. De reliquo datur praesenti seculo quoddam Physicorum genus, quod praeter duas haecenus allatas animae operationes, etiam tertiam asserere vix erubescit, quae anima omnes omnino morbos in corpore efficeret. Quae si ita se habent, possumus Essentiis, Elixiriis, aquis medicatis, Pilulis, Pulveribus, Emplastris et Unguentis aliisque huius farinae remediis carere, atque uno animae solatio et remedio omnes morbos facile curare. Cur vero adhuc hodie magna cum fiducia assumimus Tincturas Bezoardicas, alexipharmacas, Essentias dulces, pulveres vitales, et sale chymico impraegnatos adeo decantatos, aliaque medicamenta Tartareo nomine clara, quae certe omnia spiritum nostrum rationalem tangere, alterare et corrigere nequeunt. Non immerito forte haec animae operatio comparanda est cum veterum qualitatibus occultis, facultatibus et spiritibus sexcentis, egregiumque praebet ignorantiae asylum. Quippe eiusmodi animosus et spiritualis Physicus aequae ac medicus, in exponendis causis morborum, parum curat peccantes qualitates in sanguine, reliquisque humoribus, vitia temperamentorum, errores in victu et amictu. Atque si ab ipso causa morborum quaeritur, in promptu est anima, quam omnium morborum esse parentem audacter pronuntiat. Ita mens ad feces etiam relegatur, ipsique officium portam inferiorem et naturalem occludendi et aperiendi, lotiumque insigne istud Medicorum Vespasianeorum fundamentum promovendi, ab eiusmodi Physicis et artificibus Medicis absque rubore demandatur. Nolumus haec latius persequi atque fabulam agere alienationis mentis, num



ista sit intrinseca et essentialis, an vero potius extrinseca, ipsaque per se satis sana tantummodo a corpore in errorem abducatur. Si enim anima delirantium ex morbo acuto per omnem suam Essentiam delirat, cur remoto morbo corporis febrili delirium cessat? cur remedia ex helleboro, ferro aliaque Melancholiam et Maniam mentemque cum tristitia et furore delirantem quotidie in integrum restituunt? atque quae quaeso est affinitas mentis, cum dictis ex Medicina corporea depromptis medicamentis? nulla certe nisi imaginaria, atque ex studio novitatis eiusdemque pruritu exorians.

## XII.

Non est animus haec et talia, quae ad praesens institutum proprie non pertinent, ulterius exponere, sed progredimur ad affectus animi, qui Cartesio Passiones animae audiunt, atque in genere sunt magnae atque vehementes animae commotiones, cum insigni succi nervei in cerebro et nervis, atque sanguinis in corde et vasis sanguiferis agitatione, aliisque corporis mutationibus et actionibus contingentes. Licet vero horum affectuum magna sit vis ac efficacia, tamen, si cum ratione reguntur, ad conservationem corporis, et tuendam humani generis societatem praeclare faciunt: si vero extra rationis limites evagantur, animum perturbant ac inquietum reddunt, multorumque morborum occasiones et causas praebent. Tres vero palmariae affectuum animi sunt species, Admiratio nempe, Amor et Odium. Admiratio ille est affectus, quo anima considerationi obiecti cuiusdam insoliti, aut magni, cum maiori attentione nec sine insigni qua-



quadam succi nervosi intra cerebrum commotione, illam mentis attentionem vel excitante vel corroborante, inhaeret. Quod si obiectum, quod admiramur, nos bene afficiat, oritur exinde Amor, sive motus ille atque ista propensio animae, cum succi nervosi et cordis, sanguinisque agitatione, in rem, quae nobis grata et commoda uideatur. Ubi vero ab obiectis male tractamur, illa odio prosequimur, quod est averfio et motus contrarius, quo animus a re nobis molesta et noxia alienatur, cum contraria succorum, partiumque corporis motione.

## XIII.

Ex Amore, tanquam fonte, oriuntur iterum alii Affectus, nimirum Cupiditas, Libido, Voluptas, Laetitia, Generositas, Superbia, Ambitio, Existimatio, Benevolentia, Amicitia, Devotio, Veneratio, Spes, Gratitude. Cupiditas itaque in triplici maxime desiderio consistit, nam vel bonum illud, quod adhuc abest exoptamus, vel mali imminentis remotionem volumus, vel conservationem bonorum, et absentiam malorum praesentium desideramus. Libido est recreatio animi, a rebus naturalibus delectantibus, nempe deliciis epularum, et amore sexus elegantioris. Voluptas vero interior quaedam, dulcis, delicata ac gratissima animi est commotio, non tantum a rebus materialibus, prout in libidine fieri solet, verum etiam a consideratione rerum immaterialium, scilicet scientiarum, lectione librorum, profundaue meditatione nec non modis musicis exoriens. Ex qua iterum Acquiescentia animae, sive quies illa, qua anima secum habitat,

et



et dulcedine quadam, quae verbis satis exprimi non potest, demulcetur, resultat. Laetitia est iucunda animae commotio, ex eo suboriens, quod anima bonum sibi proprium, et in sua potestate esse proponit. Atque in ea omnis fructus consistit, quem anima ex possessione bonorum percipit. Generositas sive Magnanimitas est liberrima voluntatis dispositio, qua omnia, quae in potestate sua habet, propria voluntate in sui laudem ac gloriam et proximi commodum distribuit. Superbia est animae nimis bona de se opinio, turgidum fastum omnia prae se contemnentem producens. Ambitio in nimia et insatiabili honorum cupiditate consistit, qua homo, ut prae aliis auctoritate, potentia, viribus, pulchritudine et honore emineat, magna cum animi contentione allaborat. Existimatio inclinatio est animae, ad sibi repraesentandum valorem rei aestimatae. Atque si haec existimatio tanta est, ut animus etiam ad se rei aestimatae subiiciendum, cum aliquo timore, et eius fauorem demerendi gratia pronus sit, oritur exinde Cultus, Veneratio et Deuotio. Benevolentia est Cupiditas videndi bonum, evenire ei, erga quem animus bona fertur voluntate, et non immerito pro vinculo societatis humanae habetur. Haec benevolentia si ad certam quandam personam determinatur, ita, ut cum ea libenter conversemur, absque ea ferme vivere nequeamus, omniaque, quae possumus, in eius usum accommodemus, vocatur hic affectus amicitia. Spes est firma atque constans fiducia, bonum certe ac, ita, quemadmodum illud exoptamus, futurum esse. Aemulatio mentis quidam est impetus, qui eam disponit ad suscipiendas res, quas sibi successuras sperat, quia aliis easdem bene evenire videt. Gratitude tandem



tandem est cupiditas, quantum possibile illi, quem benefactorem nostrum agnoscimus, bona, quae nobis tribuit, ex omni parte remunerandi.

## XIV.

Ex odio vero proficiscuntur sequentes affectus, nempe Metus, Desperatio, Terror, Consternatio, Tristitia, Ira, Contemptus, Fastidium. Metus contrarius spei affectus est, sive talis animae inclinatio, qua sibi persuadet, bonum, quod sperat, non esse eventurum et malum quoddam certissime imminere. Si metus adeo extremus est, ut omni spe careat, se in desperationem commutat. Ubi vero malum imminens nimis timet, vel etiam praesens maiori attentione intuetur, exoritur Terror. Consternatio denique est excessus metus, quo anima animum abiicit, et nullum auxilium, malum vel praesens, vel imminens removendi, adesse putat. Tristitia est mentis languor ingratus, ab incommoditate, quae obvenit animae, ex malo quodam, quod anima sibi repraesentat ut suum. Ira seu indignatio palmaria species odii est, qua mens naturaliter fertur in eos, qui aliquid mali faciunt, quaecunque demum illud sit. Fastidium tandem anima concipit, ex rei cuiusdam longiori duratione, licet per se satis bonae, quae res, si amoeniores sunt et animum demulcentes, duratione sua producant satietatem. Quod reliquum est Contemptus, Ingratitudo, Humilitas, alii-que Affectus huc spectantes, contrarium Existimationis, Gratitude et Superbiae prae se ferunt.



## XV.

Restant vero adhuc quaedam mixtae animi passionēs, in quibus ipsa et bene et male sese habere videtur in contemplatione obiectorum. Tales mixtae Passiones animae sunt Misericordia, Vindictio, Invidia, Zelotypia et Pudor. Misericordia enim sive commiseratio est species tristitiae cum amore permixtae, aut benevolentia erga illos, quos aliquid mali pati videmus, quo eos praeter meritum laborare iudicamus. Vindictio est, per quam vis et iniuria ulciscendo, et, quod futurum est, defendendo propulsatur. Invidia est perversa plane mentis indoles, qua de bono, quod aliis contingit, dolet, et de malo, quo alii vexantur, laetatur. Zelotypia est species metus, coniuncti cum cupiditate sibi conservandi boni cuiusdam possessionem, efficiens, ut examinentur vel minimae suspicionis causae, et sumantur pro rationibus maximi momenti. Caeterum Pudor est species tristitiae fundatae amore sui ipsius, procedens ab opinione vel metu vituperii.

## XVI.

Quoniam supra dictum est, ab Affectibus et commodum et incommodum in genus humanum redundare posse, operae pretium erit indicare remedia quaedam generalia, eosdem corrigentia iuxta ac in ordinem redigentia. Inter haec primum est praesentia animi, qua nunquam se a re vel grata, vel adversa nimium occupari patitur, sed secum potius habitat, sibi que recte constat.



constat. Secundum esse potest affectus refrenans medium, aversio attentionis et cogitationum a re nos vehementius commovente. Tertium bona suppeditabit educatio, qua in pueritia ab indulgentia in affectus arcemur, coercemurque ne forsan nimis iisdem obtemperemus.

## XVII.

Antequam animi affectus prorsus mittamus, videbimus, quid statuendum sit, quando disquiritur, an etiam in homine in utero materno adhuc constituto existant. Affectus vero etiam in foetu dari et adesse, humano, ipsa sana suadet ratio, licet enim ipsi propter defectum obiectorum animam et commoventium et afficientium se non exerant, foetus tamen tanquam homo vivens anima praeditus est, adeoque procul dubio etiam affectus possidet, qui eo tempore multum debent alimento materno, atque pro diversa conditione succi alibilis etiam variant. Deinde quia Affectus ope succi nervei et sanguinis peraguntur, necessario quoque in Embryonum tenellis corporibus eiusmodi mutationes fiunt, quarum occasione variae oriuntur perceptiones animae. Sedulo etiam hic notare convenit, quod, quando succus nutritius bonae indolis fuerit, effectum amoris et reliquos ex ipso promanantes excitare forsan possit: si vero contrarium obtinet hic succus, etiam contrarii atque ex odio proficiscentes exinde profluunt mentis commotiones. Idem enim in homine nato et adulto evenit, qui vel bono et laudabili, vel parco et sordido victu utitur. Nam et cibus, et potus pro diversa sua natura, sanguinem



nem reliquosque humores magis vel minus exstimulat, atque vario modo disponit, ut animam etiam moveant, et diuturnitate temporis vel virtutibus vel vitiis adsuefaciant. Unde forte amplius minus mirandum, infantes matrum et nutricum suarum indoles aliquando imitari, quoniam ab ipsis infantibus cum lacte saepe numero etiam virtutes et vitia instillantur.

## XIIIX.

Actiones animae in corpus maxime sensationes et motiones humanas dirigunt. Nam ad perfectam sensationem, quae actio animae est, qua illa commotiones ab obiectis externis in organa sensoria illatas, et motu succi nervei ex illis ad cerebrum delatas, sentit atque percipit, tria requiruntur, obiectum externum sensibile organa sensoria attingens aequae ac commovens, organum sensorium hanc commotionem recipiens, et beneficio proprii nervi ad cerebrum propagans, et ipsa anima hanc commotionem percipiens. Obiecta externa sunt visibilia, sonora, odorifera, sapida, et quaecunque alia, quae manibus palpare possumus. Organa vero habemus quinque oculos, aures, nares, linguam et apices digitorum cum tota extremitate cutis. Quo pacto vero anima obiecta externa, mediantibus organis sensoriis percipiat, illud hactenus non adeo perspectum atque exploratum habemus, ob rationes supra de perceptione adductas. Ex his itaque clare patet, quid respondere debeamus, quando ex nobis quaeritur, num anima vel corpus vere sentiat? atque an bruta animalia etiam vere sentiant? nam in homine sensatio neque animae neque corpori



corpori soli tribui potest, in brutis vero anima rationalis prorsus deficit, cuius tamen praesentia efficit, ut vere sentiamus nos sentire, illudque clare ac distincte sciamus.

## XIX.

Sensatio externa, quam haecenus exposuimus, producit internam, quam vocamus imaginationem propterea, quia omne illud, quod per sensus externos animae nostrae proponitur, eaque sensu percipit, interno, mediante imagine persentit. Vocatur alio nomine quoque sensus communis, et duas habet species, Phantasia et Memoriam. Phantasia est commotio fibrarum cerebri, sive imaginatio continuata, ubi res perceptae varie inter sese componuntur et convertuntur, vel ab ipsa anima, vel corpore, vel occasione sensuum externorum. Memoria vero est eiusdem repetitio, ubi anima data occasione, vel fortuito, vel per se, eorundem, quae percepit, recordatur, similemque commotionem fibrarum cerebri inducit.

## XX.

Motio localis denique corporis humani potissimum ab anima proficiscitur, quippe anima influxum succi nervei e cerebro et nervis in musculos excitat, qui deinde iuxta leges Mechanicas agunt, et hac ratione motiones voluntarias et mixtas producant. Hoc ut rite intelligamus, sciendum, omnem motionem corporis humani et internam, et externam esse triplicem, nempe involuntariam vulgo ita dictam, voluntariam et



mixtam. Involuntariae motiones et actiones plane non ab anima dependere, primo intuitu videntur, quales sunt circulus sanguinis, elaboratio lymphae, bilis, lotii, succi nutritii, nervei etc. atque hoc ex eo fundamento ita asseritur, quia easdem in totum impedire nequit, ipsaeque, ipsa quasi nesciente, contingunt. Obstare vero iterum videtur, quod anima in gravioribus animi pathematibus circulum liquoris vitalis purpurei valeat sufflaminare, eandemque intercipere, ita ut plane cessare, deficiente motu cordis et arteriarum, videatur, atque ea propter etiam hic morbus animi deliquium non incongrue vocatur. Accedit, quod in iis, qui moerore et tristitia anxie laborant, brevi temporis intervallo, etiam extenuatio corporis observetur, a nutritione impedita, et succi nutritii in partes nutriendas distributione turbata, a perturbatione animae dependente. Anima itaque non tantummodo arctissime cum corpore est unita, sed etiam illius actiones dirigit, ita, ut mens imperet, corpus vero morem gerat. Hoc quoque antiquiores non ignoraverunt, quando hominis formam substantialem animam constituunt. Quod vero attinet ad actiones in homine voluntarias, sensationes et motiones animales, de iisdem equidem nemo dubitat, quod ab anima proficiantur, uti haecenus exposuimus in antecedentibus cogitationibus. Atque mixtas hominis actiones, quarum potior, et fere unica respiratio est, ab anima effici, satis abundeque apparet, si recte nobiscum reputemus, illas animae inservire in voce formanda, et sensu odoratus perficiendo quatenus anima in his negotiis aëre opus habet, eiusdemque receptionem et ingressum in corpus moderatur.



## XXI.

Habes igitur, Lector Beneuole, ea, quae hac vice de anima cogitare & disputare apud animum constituimus, quae equidem breviter, pro instituti nostri ratione, et festinante calamo, conscribere placuit, ut uno intuitu Philosophia naturalis sobria, et in compendio de anima humana compareat. Ea vero, quae ad sublimiores mentis operationes spectant, quomodo nempe in cognitione rerum, iisdemque diiudicandis procedat, proprie huius loci non sunt. Placent tamen ea, quae *Franciscus de le boe Sylvius* hac de re de Morbis animi in Praxi medica memoriae prodidit, quae coronidis loco in fine addimus. *Anima ut, de ingenii quaesitis, excogitatis et prolatis, an vera sint, necne, certior fiat et secura, eadem incudi subiicienda, et ad veritatis trutinam Experientia revocanda et expendenda iudicio committit.* Nam quaecunque constare possunt experienti, uti experientia constare naturalia omnia debent, pro veris, certisque haberi nequeunt, donec accuratum et exactum ipsius examen sustinuerint, et tanquam probata ex eiusdem purgatorio igne prodierint illaesa, pro falsis alias et fictis, uti modo dicebam, habenda. Iudicii autem humani, ut aequus ingenii Iudex habeatur, duo sunt officia et munera, primum rationum omnium ab ingenio allegatarum Expensio accurata; secundum de earundem soliditate, valore ac pondere, Decisio aequa ac iusta. Expendit Iudicium rationes et causas ab ingenio prolatas, quoties, uti referebam modo, similia experimenta instituit artifex, eaque cum Ingenii excogitatis exacte in omnibus confert, atque convenientiam cum iisdem, aut diversitatem inter ipsa



*ipsa observat et notat. Decidit autem Iudicium, quando rationes ab Ingenio productas cum experientia constantibus vel convenire, vel dissentire, adeoque vel veras, vel falsas esse pronuntiat. Est tamen et alia quoque quam praecedens, multis parasangis inferior Iudicii expansio et decisio: qua ratiocinationis duntaxat ab ingenio deductae connexum examinat; unde ipsum, si cohaerentem ac concatenatum comperiat, probabiles quidem ac verisimiles testatur rationes ab ingenio excogitatas, non autem probatas et veras; donec, uti iam dixi, non semel experientiae examen sustinuerint quod diligenter observasse et notare iuvabit, ne probabile confundatur cum probato, nec vero simile cum vero.*

T A N T V M.

